

溫江縣志卷二十九

仙釋

魚鳧成都記魚鳧王獵湔山乘虎而去

三仙女志載昔有三女嗜佛經久而覺孕父疑責之三女引刀剖腹皆佛經邑令爲立三仙觀今廢墓存

女郎通志女郎名玉蘭三月九日仙去鄉人爲立女郎祠祭之祠在邑西三十五步今廢

題壁道士不知何許人乾隆癸丑春建修文峯閣落成道士飄然而來奮筆寫憶樓記并詩八首及奎星讚字庫匾聯畢遂不見今筆迹猶存閣中

龐玉真龐珺五女母胡氏感明星而孕誕之夕異香滿室生五月能言三歲能誦金剛經六歲作小楷儼然法帖年十六一夕女夢死父謂曰可從我謁大士翼日述其夢於母遂無疾而逝

陳復慧龍蟠寺羽客左目重瞳博學金川凱旋蜀制軍文公移師駐灌超度亡兵聞慧名召令依科修建復慧作疏表俱駢體有六朝風格制軍器重

之壇畢欲攜復慧歸署力辭後厭煩囂築別業閉門杜客著廣成儀制諸書數十餘卷

僧如鏡器宇灑然自秦入蜀居二甲樂平殿時殿宇傾圮自捐重建裝塑舊神像破腹有如鏡重修四字衆驚異之年九十餘坐化